

Dör Sühneterrin.

Dör Schneidör es zum Sühneterrin gölode.
Hä schafft nit blues met Nallä on Fode,
Hä stechölt ach süst on spennt manchmoel Garn,
Daß die Nohbör äus dör Häut räusfahrn. -

Se Nohbör, dör Schustör hot ün nue vörklöt. Dör Schustör es ä göwichteher Mo. Hä hot nit grad ös Schießpolvör dörfonne, obör hä stätt met zwee Boi en Lawe on es nit schnäll äus dör Rue zö bringe. Bos owör se Nohbör, dör Schneidör macht, gätt ün üwör die Huetschnur.

Dör Borchömeistör hört sech die zwee göduldech o. Schließlech hot hä ach schu ä poer Johr of ön Bucköl - on Nohbör hot hä ach. Zum Drett sen sie en en Hof! Die schünst Möglechkoet för ön haandfeste Streit. Doe döfte drei Heileche en so ön Hof wohn on noch gäs ~~xxxxx~~ ach noch Spetaköl.

"Jonge", söt hä freundlech on lät sech gömüetlech en senn Stuel zöröck, "macht nără so wettör! Ie mösst jo ach äbbös för euöre Metmensche tue. On dără könnt ie ke grüßör Fröd gömach, äs bann ie önannör die Schädöl neischlätt."

"Dos wonn mie jo gor niöt!" vörsechört dör Schustör treuhezech. "Absölut niöt!"

"So - dos wollt ie niöt? - Noch vörtröt euch halt ach minannör on macht nit ömmör so ä Gaudi!" watört dör Borchömeistör on fört wir en ruheche Ton wettör: "Jonge, ich moens guet met euch. Bann ich nue sö, dör Schneidör muß zah Mark bözohl....."

"Oha!" fört ün doe dör Schneidör nei die Red, "äsch muß ämoel festgöställt wär bär racht hot."

"Zum Dunörkeil!" nue hebts owör ön Borchömeistör äus senn Stuel.

"Wächä dänn bessle Racht hackt ie ös ganz Lawe ofönannör römm. Ich sös euch eindringlech: So ä Streit bringt niemoels äbbös ei. Ach där bu göwennt hot noch vörlorn. Ös muß jedör denk hä hät racht on muß trotzdem nochga."

"Jaja", lacht dör Schneidör vorschmetzt, "ös git doe so ä schüe Sprüchle: Dör Klüchör git noch. On bos heißt dos en Werklechkoet? Läß die Dommhoet regier."

"Ich well nit regier!" wehrt dör Schustör ^{on} o/wonnört sech bo-römm äs die annöre so grinse.

"Leut", nimmt dör Borchömeistör wir ös Wuert, "bann ich enn von euch, odör euch alle Zwee ä Strof naufbromm, nötzt dos üwörhaupt nis. Euör Streit wörd blues noch grüßör. Met ä Strof wörd nie ä

Streit aus dör Wält göschafft, sondörn blues durch ä echt
Vörsöhnung. Ich schloe euch folchöndös für: Dör Schneidör gätt
ön Tog met ön Schustör nauf die Rüe. Dör Schustör muß ordlech
Ässä on Trenkä ställ. Doe hot ie Z eit minannör zö redä on euch
zö vörsöhne. Sett iös zöfriedä?"

Sie warns - on Mettä Juli stinne sie früe ön zwe Uhr maschbö-
reit. Die Rucksäck warn schwer böbackt: Wuescht on Schöнке on
Oiör on Schnaps. Ja, dör Schustör wollt sech nit läß lomp. Ön
schwaze Hofä zum Kaffeekoche, Sense on Rächä on Dengölzeuch,
dos go ä ganz schüe Göwicht. On schließlech most dos Zeuch üwör
vier Stonn bergauf göschloppt wär.

Ös wor noch halwör feistör bi die Zweek lueszoche. Göred hon
sie fast nis. Nit wäll sie wir büös warn minannör, sie hon halt
die Luft mehr zum Schnaufe göbraucht. Äussördäm es en ach gornit
zum Redä, bann me so en dör hall Nocht durch ös Durf on durch
die Flur leift. Mensch on Vie on die Natur schloffle noch on
en so ä friedlech Stömmung wördme direkt odächtech.

Endlech warnse dowe ön Hoedölstoi, ställte ör Zält auf, packte
die Rucksäck nei on finge o zö mävä.

"Schneidör, ös schnätt dör prima!" lobt dör Schustör.

"Ja, dos hot mir me Vottör gölernt, där konnts noch bässör bi
ich." fröt sech dör ~~Schustör~~ Schneidör.

Ös hat guet götat, doe es ös Gros schnittech on die zwee Streit-
vöchöl moete flott dohie on warn so zöfriede minannör äs banns
niemoels ön Wuertwassöl zwösche ür göga hätt. Of oimoel, sie
hatte grod so ä Stönn gömoet, zoche die Naböl übör ön Hoedölstoi
on ös fing schüe langsam o zö renä.

"Schneidör", riöf dör Schustör, "mi gänn nei ös Zält on ässä
ons äbbös. Däräzeit läßt dör Rä wir noch."

Sie kroche nei ös Zält on ose on trāanke on rauchte ör Pfeufe.
Dör Rä trommölt schüe gleichmäße of die noss Zältwaand on
dos schlöförech Göräusch on die volle Bäuch mochte die zwee
so müed, daß siä einträchtech äscht ämoel ä Gösätz minannör
schnarchte. Zwöshedurch bannse aufwachte, übte siä sech wir
en Ässä on Trenkä on Rauchä on liöse ön Härrgott ön guete Mo
sei.

On ös rānt on rānt - on rānt ön ganze Tog.

"Dos es Härrgottswatör." moent dör Schneidör. "Neid on Streit
on all dos widörwārttech Zeuch vörgesstme doe. Huet ro för on-
sörn Börchömeistör!"

"Ja, Huet ro!" bökräftecht dör Schustör on hot natürlech nit gödocht, daß en ön Schneidör sennör schüe Red ach ä wink Spitzfendechkoet göstäck könnnt.

So ön Rätog en ön winzeche Zält of dör weit Rüe muß me dör-lat ho. Mi hört on sit ken Mensche, blues ganz vörschwomme en ön Naböl ä poer kromme Tännlech on en dänn woiche dufte-che Hö schlöffme bi ä Härrgott on vorgesst die ganz uenüetech Hätz von dör Wält. Obör dör Schneidör wor ä nüchtörnör Mo on hot die Wält do onne nit gaanz vorgässä.

Owöds, bis ä wink hällör wuer kroch hä äus ön Zält, zwerbölt onnörnehmungslustech senn Schnorreboert, ho ckt Sensä on Rächä of ön Bucköl on sen leere Rucksock.

"Schustör", söt hä, "mei Tog es römm!"

"Ja obör, mi hon doch gornis gömoet." stöttört dör Schustör dörschrocke.

"Nochbör, Vörtrog es Vörtrog." Bi ä Schullehrör hob dör Schneidör senn lange dörre Fengör. "Doeden stätt ich soll en Tog met dir nauf die Rüe. On dos hun ich gömocht, dann ich hall mich streng o men Vörtrog." söts on ging.

Do moßt dör Schustör äscht ämoel schorf nochdenk. - Ich hun ön Sühneternin göwonn. Ich hun Schonke on Oiör on Wuescht on Schnaps bözohlt on huns rauf die Rüe göschloppt. Dör Schneidör hots göfrässä - on ich döff me Hö äloi meä! Ja, do hun ich jo vörlorn! "Huet ro för onsörn Bөрchömeistör", söt hä laut für sech hie, "där hots gösöt: Benn Streitä vörläuscht ach där bu göwennt."

Seelönvörgnücht moet hä ön nächste Tog se Hö äloi. Dör Schneidör, där Pfiffikus hat ün för ös ganz Lawe kuriert. - Allördings met ä wink Onnöstützung von ön Petrus.

Obs die do obe ömmör ä wink met dör Schuldeche halle? -

Dos mösstme jo eichöntlech wess.

+++++